

PWYLLGOR SGRIWTINI PARTNERIAETH AC ADFYWIO

Cofnodion y cyfarfod hybrid a gynhaliwyd ar 19 Mehefin, 2024

YN BRESENNOL:

Cynghorydd Dylan Rees (Cadeirydd)
Cynghorydd Gwilym O Jones (Is-gadeirydd)

Cynghorydd Non Dafydd, Euryrn Morris, Pip O'Neill,
Derek Owen, Margaret Murley Roberts, Ken Taylor a
Sonia Williams

Mr John Tierney – Yr Eglwys Gatholig yng Nghymru

Aelod Portffolio

Cynghorydd Dafydd Roberts – Aelod Portffolio Addysg a'r
Gymraeg

WRTH LAW:

Prif Weithredwr,
Cyfarwyddwr Addysg, Sgiliau a Phobl Ifanc
Pennaeth Democratiaeth,
Rheolwr Sgriwtini (AGD),
Swyddog Sgriwtini (EA),
Swyddog Pwyllgor (MEH)

HEFYD YN BRESENNOL:

Cynghorydd Llinos Medi – Arweinydd y Cyngor ac Aelod
Portffolio Datblygu Economaidd;
Cynghorydd Robin Williams – Dirprwy Arweinydd ac Aelod
Portffolio Cyllid;
Cynghorydd Carwyn Jones – Aelod Portffolio Corfforaethol a
Phrofiad Cwsmer;

Cynghorydd Alun Roberts – Aelod Portffolio Gwasanaethau
Oedolion

YMDDIHEURIADAU:

Cynghorwyr Jeff M Evans a John Ifan Jones

Mrs Gillian Thompson – Rhiant Lywodraethwr – Ysgolion
Cynradd;

Mrs Wenda Owen – Yr Eglwys yng Nghrymu

Aelodau Portffolio

Cynghorydd Neville Evans – Aelod Portffolio Hamdden,
Twristiaeth a Morwrol;

Cynghorydd Nicola Roberts – Aelod Portffolio Cynllunio,
Diogelu'r Cyhoedd a Newid Hinsawdd.

Cyfarwyddwr Swyddogaeth (Busnes y Cyngor)/Swyddog
Monitro;
Rheolwr Polisi a'r Gymraeg (FO)

1 YMDDIHEURIADAU

Fel y nodir uchod.

2 DATGANIAD O DDIDDORDEB

Dim i'w hystyried.

3 COFNODION

Cadarnhawyd bod cofnodion y cyfarfodydd canlynol yn gywir:-

- Cofnodion y cyfarfod a gynhaliwyd ar 17 Ebrill, 2024
- Cofnodion y cyfarfod a gynhaliwyd ar 21 Mai, 2024 (Ethol Cadeirydd/Is-gadeirydd)

4 ADRODDIAD BLYNYDDOL Y GYMRAEG : 2023/2024

Cyflwynwyd Adroddiad Blynyddol yr Iaith Gymraeg i'w ystyried gan y Pwyllgor, ac i wneud unrhyw sylw arno cyn ei gyflwyno i'w gymerdawyo gan yr Aelod Portffolio i'w gyhoeddi.

Dywedodd yr Aelod Portffolio Addysg a'r Gymraeg, yn unol â Rheoliadau Safonau'r Iaith Gymraeg 2015, bod rhaid i'r Cyngor baratoi Adroddiad Blynyddol mewn perthynas â chydymffurfiaeth gyda'r safonau. Dywedodd bod cynnydd wedi bod yn nifer y staff sy'n derbyn Hyfforddiant iaith Gymraeg yn ystod y flwyddyn ac mae'r Ganolfan Dysgu Cymraeg Genedlaethol wedi cefnogi'r Cyngor gyda hyn. Dywedodd ei fod yn falch fod Comisiynydd y Gymraeg ac Arolygiaeth Gofal Cymru wedi canmol yr Awdurdod am fodloni'r holl ofynion mewn perthynas â'r Gymraeg.

Dywedodd y Pennaeth Democratiaeth fod yr Adroddiad Blynyddol yn dilyn strwythur sy'n cyd-fynd â gofynion Comisiynydd y Gymraeg, ac er mwyn sicrhau cydymffurfiaeth, mae'n rhaid adrodd ar y penawdau gofynnol. Dywedodd bod sefyllfa Ynys Môn wedi'i ymgorffori yn yr adroddiad er mwyn tynnu sylw at gyflawniadau ehangach o fewn yr Awdurdod yn ystod y flwyddyn ddiwethaf.

Wrth ystyried yr adroddiad, codwyd y pwyntiau canlynol ymhlith y Pwyllgor:-

- Cyfeiriwyd at yr effaith ar brosesau recriwtio ar gyfer swyddi sy'n anodd eu llenwi a'r gofyniad, mewn rhaid gwasanaethau, i recriwtio pobl sydd angen Hyfforddiant a chymorth ychwanegol i ddatblygu eu sgiliau Cymraeg, ac i ba raddau mae canolbwyntio ar y Gymraeg yn cyfyngu'r gallu i ddenu unigolion at swyddi sy'n gofyn am set penodol o sgiliau? Codwyd cwestiynau pellach ynghylch y ffaith fod 178 o aelodau staff gyda sgiliau iaith Gymraeg rhwng 0 –

1, gyda dim ond 27 wedi derbyn hyfforddiant. Dywedodd y Pennaeth Democratiaeth ei bod yn hanfodol i'r Cyngor ddarparu hyfforddiant i staff er mwyn cefnogi eu sgiliau ieithyddol. Dywedodd bod y Gymraeg yn cael ei hystyried yn sgil hanfodol gyda lefelau iaith yn amrywio yn dibynnu ar ofynion y swydd. Os bydd sgiliau ieithyddol swydd yn newid, bydd angen cynnal trafodaeth gyda'r Panel Recriwtio. Dywedodd bod rhai swyddi yn gofyn am sgiliau ieithyddol lefel is, a bydd y lefel honno yn parhau yn rhan o'r swydd. Cydnabyddir bod gofyniad i fuddosddi ymhellach i wella sgiliau ieithyddol staff. Mae recriwtio ar gyfer rhai swyddi arbenigol yn heriol am nifer o resymau, gan gynnwys gofynion ieithyddol. Dywedodd y Prif Weithredwr bod grymyster y Polisi Iaith Gymraeg a'r sgiliau ieithyddol disgwylidig yn ffordd o fesur cynnydd mewn sgiliau iaith staff a diwylliant Cymraeg yr Awdurdod. Dywedodd, pan fydd unigolyn mewn tîm yn cael effaith ar wasanaethau rheng flaen oherwydd diffyg sgiliau Cymraeg, mae disgwyliad o fewn y contract cyflogaeth i'r unigolyn hwnnw gwblhau hyfforddiant mewn perthynas â'r Gymraeg.

- Gofynnwyd cwestiynau ynghylch pa wybodaeth ychwanegol all ychwanegu gwerth i'r Adroddiad Blynyddol? Dywedodd y Pennaeth Democratiaeth fod trafodaethau mewnol wedi bod yn mynd rhagddynt mewn perthynas â sut ellir gwella'r Adroddiad Blynyddol yn y dyfodol, yn enwedig o ran defnyddio data yn ymwneud â defnydd o'r Gymraeg mewn gwasanaethau sy'n cael eu cynnig gan y Cyngor, a dewis iaith cwsmeriaid. Dywedodd y byddai astudiaethau achos yn defnyddiol er mwyn gwella'r Adroddiad Blynyddol ac i olrhain datblygiadau a chynnydd staff sy'n cwblhau hyfforddiant ar yr iaith Gymraeg.
- Gwelwyd dirywiad mewn cyrsiau hyfforddi mewnol ar yr iaith Gymraeg yn 2023/24 i 30% o 55% yn 2022/23. Gofynnwyd a fyddai'n fuddiol cynnig sesiynau hyfforddiant ychwanegol a'r angen i sicrhau bod adnoddau'n cael eu defnyddio'n fwy effeithiol. Gofynnwyd a yw staff yn teimlo'n anhyderus i siarad Cymraeg, a phenderfynwyd y dylid darparu sesiynau ymwybyddiaeth o'r Gymraeg er mwyn rhannu mwy am hanes a diwylliant Cymru. Dywedodd y Pennaeth Democratiaeth efallai y bydd mwy o gyrsiau hyfforddiant dwyieithog yn cael eu darparu, a bod angen edrych ar ddata mewn perthynas â nifer y bobl sy'n cofrestru ar gyfer y sesiynau hyfforddi hyn. Nododd y byddai'n gwneud ymholiadau mewn perthynas ag argaeledd sesiynau ymwybyddiaeth o'r Gymraeg.
- Codwyd cwestiynau ynghylch a oes cyrsiau ar gael i barhau i wella sgiliau ysgrifennu ac iaith. Dywedodd y Pennaeth Democratiaeth eu bod hi'n bwysig cynnig amrywiaeth o hyfforddiant ar lefelau gwahanol i staff, o sgiliau sylfaenol i gyrsiau gloywi iaith. Mae gwaith wedi mynd rhagddo gyda'r Ganolfan Dysgu Cymraeg Genedlaethol sy'n cynnig cyrsiau hyfforddiant am ddim, ac mae cyrsiau ar gael fel bo pobl yn parhau i wella eu sgiliau ysgrifennu ac iaith Gymraeg. Dywedodd, yn ystod y broses Drafod Flynyddol gyda staff, gellir trafod lefelau iaith Gymraeg a gellir cynnig hyfforddiant i staff er mwyn defnyddio'r Gymraeg yn ffurfiol yn y gweithle.
- Nodwyd bod cynnydd wedi bod yn y defnydd o'r Gymraeg mewn ysgolion yng Nghaerdybi, ond bod diffyg cyrsiau Cymraeg ar gyfer oedolion yn yr ardal. Dywedodd y Pennaeth Democratiaeth fod yr Awdurdod yn gweithio gyda sefydliadau partner drwy Fforwm Iaith Ynys Môn sy'n trefnu cyrsiau Cymraeg mewn cymunedau.
- Gofynnwyd a oedd canfyddiadau'r ymchwil arloesol i'r maes recriwtio, i helpu sefydliadau i recriwtio mwy o siaradwyr Cymraeg drwy gael gwared ar unrhyw

rwysrau wrth ymgeisio, wedi'u cyhoeddi. Dywedodd y Pennaeth Democratiaeth y bydd y canfyddiadau yn cynorthwyo proses recriwtio'r Awdurdod ac yn helpu Rheolwyr i bennu lefelau iaith ar gyfer swyddi penodol o fewn y Cyngor.

- Cyfeiriwyd at yr asesiad ar yr effaith ar yr iaith Gymraeg pan mae ceisiadau cynllunio yn cael eu cyflwyno, yn enwedig datblygiadau sylweddol mewn cymunedau a'r effaith all ei gael yn y tymor hir. Dywedodd y Pennaeth Democratiaeth fod ymgynghoriad yn cael ei gynnal gyda'r Rheolwr Polisi a'r iaith Gymraeg wrth ystyried ceisiadau cynllunio yn ystod y broses ymgynghori. Dywedodd bod Asesiad ar yr iaith Gymraeg yn cael ei ddarparu gan y datblygwr dan reoliadau cynllunio. Nododd y gellir ystyried y broses hon dan y Cynllun Datblygu Lleol newydd. Gwnaed sylwadau bod angen cefnogaeth gan Gomisiynydd y Gymraeg i roi pwysau, ar lefel genedlaethol, ar Lywodraeth Cymru ynghylch yr angen i newid y ddeddfwriaeth lle gall datblygwyr ddarparu Asesiad Effaith ar yr iaith Gymraeg. Dywedodd y Prif Weithredwr y bydd cydweithio yn mynd rhagddo rhwng Swyddogion ar lefel strategol wrth ddatblygu Cynllun Datblygu Lleol newydd, fodd bynnag, mae'n rhaid gwerthuso ceisiadau cynllunio drwy ddefnyddio data, ac mae'n rhaid ystyried yr iaith yn llawn o fewn y polisïau cynllunio cenedlaethol sy'n cael eu gosod gan Lywodraeth Cymru. Dywedodd yr Aelod Portffolio Addysg a'r Gymraeg bod llythyr ganddo ef a'r Aelod Portffolio Cynllunio, Diogelu'r Cyhoedd a Newid Hinsawdd wedi'i anfon ymlaen at Lywodraeth Cymru er mwyn pennu a oes canllawiau mwy cynhwysfawr ar gael mewn perthynas ag asesiadau risg ar iaith, gan fod nifer o siaradwyr Gymraeg ar yr Ynys.
- Nodwyd bod rhai aelodau Cyngorau Tref a Chymuned yn methu â chyfrannu mewn cyfarfodydd yn Gymraeg gan nad yw cyfleusterau cyfieithu ar gael. Gofynnwyd a oes cymorth cyfieithu ar gael ar gyfer cyfarfodydd y Cyngorau Tref a Chymuned. Dywedodd y Pennaeth Democratiaeth y bydd gwaith yn mynd rhagddo i adnabod Pencampwyr Iaith Gymraeg yn eu cymunedau, ac i sicrhau bod Cyngorau Tref a Chymuned yn deall y gofynion ac arferion presennol. Nododd bod bwriad i ystyried darpariaeth yr iaith Gymraeg yn Fforwm y Cyngorau Tref a Chymuned ym mis Hydref. Mae'r Rheolwr Polisi a'r Gymraeg wedi bod mewn Cyswllt â sefydliadau sy'n cynnig cyfleusterau cyfieithu i gefnogi Cyngorau Tref a Chymuned.

PEDNERFYNWYD:-

- **Derbyn Adroddiad Blynyddol yr Iaith Gymraeg ar gyfer 2023/24;**
- **Nodi ei gynnwys a bod y cwestiynau sgrïwtini yn cael eu hanfon ymlaen at yr Aelod Portffolio fel rhan o'r broses o'i gyflwyno ar gyfer cymeradwyaeth ddirprwyedig, ac yna i'w gyhoeddi.**

CAMAU:

- **Bod sesiynau ymwybyddiaeth o'r Gymraeg yn cael eu cynnal i hyrwyddo hanes a diwylliant Cymru;**
- **Bod y broses ymgynghori ar yr effaith ar yr iaith Gymraeg yn cael ei hadolygu yn ystod y broses ceisiadau cynllunio.**

Cyflwynwyd – adroddiad gan y Cyfarwyddwr Addysg, Sgiliau a Phobl Ifanc i'w ystyried gan y Pwyllgor.

Dywedodd yr Aelod Portffolio ar gyfer Addysg a'r Iaith Gymraeg mai diben yr adroddiad yw darparu diweddariad blynyddol ar y cynnydd a wnaed mewn perthynas â'r Cynllun Strategol y Gymraeg mewn Addysg.

Dywedodd y Cyfarwyddwr Addysg, Sgiliau a Phobl Ifanc fod ysgolion wedi derbyn cefnogaeth gan y Gwasanaeth Dysgu, canolfannau addysg, y Siarter Iaith a GwE yn ystod 2023/24 i sicrhau darpariaeth o safon sy'n adlewyrchu categorïau ysgolion ac anghenion disgyblion mewn ysgolion ar yr Ynys. Nododd bod rhaid cyflwyno'r adroddiad cynnydd ar y Cynllun Strategol y Gymraeg mewn Addysg i Lywodraeth Cymru er mwyn adrodd ar y cynnydd i fodloni blaenoriaethau'r Cyngor a mynd i'r afael ag amcanion y Cynllun. Mae'r adroddiad yn nodi sefydlogrwydd allbynnau 1,2,3, 5 a 6 gyda dirywiad yn allbwn 4 (disgyblion sy'n astudio drwy gyfrwng y Gymraeg ac allbwn 7 (nifer y staff sy'n gallu addysgu drwy gyfrwng y Gymraeg). Mae'r categorïau iaith wedi'u trafod gyda'r ysgolion Categori 1 – Cyfrwng Saesneg, Categori 2 – Dwyieithog a Chategori 3 – Cyfrwng Cymraeg. Mae cyfnod trawsnewid ar gyfer gweithio tuag at Gyfrwng Cymraeg (T3). Fel y nodwyd yn yr adroddiad, mae pob ysgol gynradd, oni bai am un, yn Categori 3 ac mae 4 ysgol uwchradd o fewn Categori 3, gydag un ysgol uwchradd yn T3. Aeth ymlaen i grybwyll 'Cynllun y Llan', sy'n arbennig ar gyfer y Canolfannau Iaith Gymraeg a'r 96 o ddisgyblion cynradd sy'n mynychu'r canolfannau hyn, a'r 150 disgybl sy'n derbyn cymorth ieithyddol ôl-ofal. Bydd un aelod o'r ganolfan yn gweithio ar safle Ysgol Uwchradd Caergybi, fel elfen strategol o'r cynllun trawsnewid i gefnogi'r ysgol i symud o Categori T3 i Categori 3.

Cafodd y pwyntiau canlynol eu trafod ymhlith y Pwyllgor:-

- Gofynnwyd sut y gellid sicrhau rhieni y bydd eu plant yn derbyn addysg yn Gymraeg ar ôl symud o ysgol gynradd Categori 3 i Ysgol Uwchradd Caergybi. Dywedodd y Cyfarwyddwr Addysg, Sgiliau a Phobl Ifanc y bydd cynllun yn cael ei baratoi yn Ysgol Uwchradd Caergybi sy'n cynnwys creu ffrwd Categori 3 ym mlwyddyn 7 o fis Medi 2024. Erbyn 2029, bydd gan bob blwyddyn ffrwd Categori 3 yn yr ysgol. Penodir un dosbarth blwyddyn 7 i dderbyn addysg drwy gyfrwng y Gymraeg o fis Medi 2024, gan gynnal hynny o flwyddyn 8 i 11. Mae staff eisoes wedi cwblhau cyrsiau Cymraeg ac maent yn frwdfrydig y bydd disgyblion o ysgolion cynradd Caergybi yn derbyn eu haddysg drwy gyfrwng y Gymraeg yn Ysgol Uwchradd Caergybi. Codwyd cwestiynau pellach ynghylch a fydd y ddarpariaeth ar gael i rieni gysylltu â'r ysgolion mewn perthynas â phroblemau eraill a all godi sy'n ymwneud ag iaith. Dywedodd y Cyfarwyddwr Addysg, Sgiliau a Phobl Ifanc bod Swyddog Siarter Iaith wedi cael ei benodi, fydd yn canolbwyntio ar sut i wella'r Gymraeg yn yr ysgol a thu allan i'r ystafell ddosbarth.
- Gofynnwyd cwestiynau ynghylch i ba raddau mae gwasanaeth y Canolfannau Iaith yn ymateb yn llawn i anghenion trochi ledled Ynys Môn? Dywedodd y Cyfarwyddwr Addysg, Sgiliau a Phobl Ifanc bod un Canolfan Iaith cynradd ac uwchradd sy'n ymateb i anghenion disgyblion sy'n symud i'r ardal. Gwneir ceisiadau am gyllid grant er mwyn gwella'r capasiti yn y Canolfannau Iaith, a

phenodir athro o fewn y ddarpariaeth trochi uwchradd. Dywedodd ei bod yn amlwg fod angen am y Canolfannau Iaith gan fod rhestr aros llawn disgyblion sydd eisiau mynychu'r canolfannau hyn. Bob tymor, gwelir 32 o ddisgyblion o ysgolion cynradd a 30 disgybl o ysgolion uwchradd yn mynychu'r canolfannau hyn. Mae llwyddiant y canolfannau yn amlwg iawn, gan fod awdurdodau eraill wedi mabwysiadu'r un ddarpariaeth. Fodd bynnag, mae heriau ariannol yn parhau o ran darparu gwasanaeth y Canolfannau Iaith. Gwnaed sylwadau pellach fod disgyblion yn gorfod disgwyl am y ddarpariaeth. Dywedodd y Cyfarwyddwr Addysg, Sgiliau a Phobl Ifanc fod athrawon mewn ysgolion eisoes yn meddu ar y sgiliau iaith i addysgu'n ddwyieithog, ond yn sgil y cynnydd mewn galw am Ganolfannau Addysg, mae'n anffodus bod disgyblion yn gorfod disgwyl i fynychu'r Canolfannau Iaith.

- Gofynnwyd cwestiynau ynghylch yr heriau a ragwelir o ran symud Ysgol Uwchradd Caerdybi o Gategori T3 i Gategori 3. Dywedodd y Cyfarwyddwr Addysg, Sgiliau a Phobl Ifanc fod yr ysgol wedi ymrwymo i barhau â'r broses drawsnewid er mwyn sicrhau bod disgyblion yn derbyn eu haddysg drwy gyfrwng y Gymraeg o flwyddyn 7 ymlaen. Mae parhau i fonitro ac ymgynghori â rhieni yn hanfodol o ran ymateb i unrhyw bryderon a all godi.
- Nodwyd bod yr Ysgol Eglwys yng Nghaerdybi yng Nghategori 2, a gofynnwyd a oes modd symud yr ysgol i Gategori 3. Dywedodd y Cyfarwyddwr Addysg, Sgiliau a Phobl ifanc fod yr ysgol Eglwys wedi'i rhoi yng Nghategori 3 yn sgil gwaith caled yr ysgol. Yr ysgol arall o fewn yr Awdurdod sydd yng Nghategori 2 ar hyn o bryd yw'r Ysgol Sefydledig, ac mae ymrwymiad o fewn yr ysgol i sicrhau bod y ddwy iaith yn cael eu haddysgu ac i benodi athro i ganolbwyntio ar ddarpariaeth yn y Gymraeg, sy'n rhan o'u cynllun datblygu er mwyn gwella'r defnydd o'r Gymraeg yn yr ysgol.
- Gofynnwyd gwestiynau ynghylch i ba raddau mae Cynllun Strategol y Gymraeg mewn Addysg yn debygol o gyflawni'r hyn sy'n ofynnol ac a yw ar y trywydd iawn? Dywedodd y Cyfarwyddwr Addysg, Sgiliau a Phobl Ifanc bod heriau o fewn y Cynllun Strategol i fynd i'r afael â'r targedau disgwylidig. Mae Strategaeth Iaith Gymraeg Llywodraeth Cymru wedi gosod targed o 1 miliwn o siaradwyr erbyn 2050, sy'n her o fewn y sector Addysg gan fod lefel uchel o bobl nad ydynt yn siarad Cymraeg yn symud i'r Ynys. Mae cofnodion y Cyfrifiad hefyd wedi dangos bod nifer y bobl sy'n siarad Cymraeg ar aelwydydd wedi disgyn. Fodd bynnag, mae tystiolaeth gref o fewn ysgolion yr Ynys yn dangos bod yr iaith Gymraeg yn rhan hollbwysig o addysg plant. Dywedodd y Prif Weithredwr fod cofnodion y Cyfrifiad yn dangos bod 70% o'r boblogaeth yn meddu ar ymwybyddiaeth o'r iaith Gymraeg o gymharu a 25% mewn rhannau eraill o Gymru. Dywedodd fod y targed o gyrraedd 1 miliwn o siaradwyr Cymraeg erbyn 2050 yn heriol, ac mae sefydliadau partner angen bod yn ymwybodol fod polisiau a deddfwriaeth, ynghyd â chyllid, yn bwysig er mwyn cyfateb â'r targedau hyn.
- Nodwyd y ffaith bod plant yn dueddol o droi i siarad Saesneg gyda'i gilydd yn yr ysgol yn dilyn cyfnod chwe wythnos o wyliau haf. Gofynnwyd cwestiynau ynghylch y ddarpariaeth sydd ar gael i rieni ddysgu Cymraeg, er mwyn cefnogi eu plant i siarad Cymraeg gartref. Dywedodd y Cyfarwyddwr Addysg, Sgiliau a Phobl Ifanc fod cyrsiau ar gael drwy Ganolfan Bedwyr, Prifysgol Bangor a darpariaethau eraill, i ddysgu Cymraeg ac fe hysbysir hyn mewn ysgolion, gyda rhai ohonynt yn hwyluso'r ddarpariaeth i ddysgu Cymraeg yn yr ysgolion.

- Nodwyd bod Eisteddfod Genedlaethol yr Urdd yn dod i Ynys Môn yn 2026. Gofynnwyd a ellir ymgorffori'r gwaith o hyrwyddo'r Urdd yn y Cynllun Strategol. Dywedodd y Cyfarwyddwr Addysg, Sgiliau a Phobl Ifanc y bydd yn gyfle i dynnu sylw at ddatblygiad y Gymraeg ar yr Ynys pan fydd yn Eisteddfod yn cael ei chynnal yn 2026, a gellir cynnwys hyn yn y Cynllun Strategol. Mae gweithio mewn partneriaeth â sefydliadau sydd ynghlwm â phlant a phobl ifanc yn hanfodol o ran hyrwyddo'r iaith. Nododd y bydd yn gyfle i deuluoedd nad ydynt yn siarad Cymraeg fynychu'r Eisteddfod.

PEDNERFYNWYD nodi'r diweddariad mewn perthynas â data'r Cynllun Strategol y Gymraeg mewn Addysg Ynys Môn 2022-2023 a'r dull arfaethedig ar gyfer rhannu'r wybodaeth hon.

CAM: Fel y nodwyd uchod.

6 ENWEBIAD PWYLLGOR - PANEL SGRIWTINI CYLLID

Cyflwynwyd – adroddiad gan y Rheolwr Sgriwtini mewn perthynas â'r uchod.

PENDERFYNWYD penodi'r Cynghorydd Derek Owen i wasanaethau ar y Panel Sgriwtini Cyllid.

7 BLAEN RAGLEN WAITH - 2024/2025

Cyflwynwyd adroddiad y Rheolwr Sgriwtini oedd yn amlinellu Blaen Rhaglen Waith mynegol y Pwyllgor Sgriwtini Partneriaeth ac Adfywio ar gyfer 2024/2025 i'w ystyried.

PENDERFYNWYD:-

- **Cytuno ar fersiwn gyfredol y blaen rhaglen waith ar gyfer 2024/2025;**
- **Nodi'r cynnydd hyd yma o ran gweithio'r blaen rhaglen waith.**

Daeth y cyfarfod i ben am 3.25 o'r gloch yp

**CYNGHORYDD DYLAN REES
CADEIRYDD**